

Unammilleqatigiinnermut Ataatsimiititaliap suliassai pillugit Namminersorlutik Oqartussat nalunaarutaat

Unammilleqatigiinneq pillugu Inatsisartut inatsisaat nr. 1, 15. maaji 2014-imeersumi (unammilleqatigiinnermut inatsit) § 26, imm. 3, kingullermillu inatsisartut inatsisaat nr. 55, 25. novemberi 2024-meersumi allannguuteqartinneqartoq naapertorlugu, imatut aalajangeersaasoqarpoq:

Kapitali 1

Unammilleqatigiinnermut Ataatsimiititaliaq

§ 1. Unammilleqatigiinnermut Ataatsimiititaliap unammilleqatigiinnermut inatsisip taassumalu malitsigisaanik maleruagassat aalajangerneqarsimasut aqunneqarnissaat pingaarnersaallutik akisussaaffigai.

Imm. 2. Unammilleqatigiinnermut Ataatsimiititaliaq unammilleqatigiinnermut inatsisip aqunnerani Naalakkersuisunut attuumassuteqanngilaq.

§ 2. Unammilleqatigiinnermut Ataatsimiititaliaq inuussutissarsiornermik ingerlataqartut atuisartullu soqutigisaannut attuumassuteqanngitsumik siulittaasup tullianik toqqaassaaq.

Imm. 2. Ilaasortaq toqqarneqarnermini inuussutissarsiornermik ingerlataqartut atuisullu soqutigisaannut attuumassuteqanngitsoq, piffissami atuuffigisamini inuussutissarsiornermi suliffeqarfinnut, inuussutissarsiornermi kattuffinnut imaluunniit atuisartut kattuffinut taama attuumassuteqalissagalaruni, taamaalillunilu arlaannut attuumassuteqannginnissamut piumasaqaat eqquutikkunnaarlugu, ilaasortaq Unammilleqatigiinnermut Ataatsimiititaliamit tunuassaaq. Taamaalereerpat ilaasortaagaluartup piffissap atuuffissaraluata sinneranut Naalakkersuisut ilaasortamik allamik toqqaassapput.

Imm. 3. Nalunaarut manna malillugu ilaasortaq § 10 naapertorlugu nipangiussisimasussaataitanerminik pisussaataaffimminiksumiginnaasimappat imaluunniit pisussaaffimminik annertuumik sumiginnaasimappat tunuartinneqarnissaa pillugu siulittaasoq Naalakkersuisunut inassuteqarsinnaavoq.

Imm. 4. Kattuffiit ilaasortanik innersuussisinnaatitaasut, ilaasortassanik Unammilleqatigiinnermut Ataatsimiititaliamut innersuussinerminni unammilleqatigiinnermut inatsimmi ilaasortat piginnaasai pillugit piumasaqaatit taaneqartut tungaasigut eqquutsisinnasutut tunngavilersuuteqarlutik ilaasortanik innersuussissapput.

Kapitali 2

Piginnaatitaanerit aamma aalajangiinerit

§ 3. Unammilleqatigiinnermut Ataatsimiititaliaq, Naalakkersuisunit peqquneqarnermigut, unammilleqatigiinnermut inatsit malillugu maleruagassanik aalajangiinissamut atatillugu oqaaseqaateqartassapput.

§ 4. Unammilleqatigiinnermut Ataatsimiititaliaq sammisat tunngavissaqarluartut imaluunniit immikkut ittumik pingaaruteqarluinnartut pillugit aalajangiissaaq.

Imm. 2. Unammilleqatigiinnermut Ataatsimiititaliap unammilleqatigiinnermut inatsit malillugu aalajangigai ilaasortat kikkut suliap sammineqarnerani peqataasimanersut pillugit paasissutissanik imaqaassapput.

Imm. 3. Ataatsimiititaliap suliaqarnera pillugu nassuiaatit paasissutissallu Atuisartunut Unammilleqatigiinnermullu Aqutsisoqarfiup tamanut saqqummiussinnaavai.

§ 5. Unammilleqatigiinnermut Ataatsimiititaliaq suliamik sammisaqarnissamik kinguartitsinissaq pillugu aalajangersinnaavoq, paasissutissanik amerlanerusunik pissarsiornissamut pisariaqarpat, taamattaaq Unammilleqatigiinnermut Ataatsimiititaliap sulianik immikkut ilisimasaqartut Unammilleqatigiinnermut Ataatsimiititaliap suliarinninneranut taaseqataanissaminnut pisinnaatitaaffeqartinnagitpeqataaqullugit qinnuigisinnaallugit.

Imm. 2. Sulianik ilisimasaqartut suliffeqarfinnut imaluunniit suliffeqarfinnut kattussimasunut suliamik suliarinninnerminni peqataaffigisaminnut attuumassuteqassagunik soqutigisaqassanngillat imaluunniit attuumassuteqarfeqassanngillat.

Kapitali 3

Unammilleqatigiinnermut Ataatsimiititaliap allattoqarfia

§ 6. Unammilleqatigiinnermut Ataatsimiititaliap allatseqarnikkut suliai Atuisartunut Unammilleqatigiinnermullu Aqutsisoqarfimmit isumagineqartarput.

§ 7. Unammilleqatigiinnermut Ataatsimiititaliap ataatsimiinneri tamanut ammasuunngillat.

§ 8. Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, Unammilleqatigiinnermut Ataatsimiititaliap suliami aalajangiinnginnerani Unammilleqatigiinnermut Ataatsimiititaliamut oqaasiinnartigut naatsumik ilanngussisinnaatitaapput. Ilanngussinerup sivissusaata, siulittaasoq aalajangiisartut suleriusiat naapertorlugu allatut aalajangersaasimanngippat, minutsit 10-it qaangissanngilai. Oqaasiinnartigut ilanngussaqaarniartoq allanit sinniisoqarsinnaavoq imaluunniit ikiorneqarsinnaalluni.

Imm. 2. Ataatsimiinnermit Unammilleqatigiinnermut Ataatsimiititaliap suliami aalajangiinissaanik naatsorsuutigineqartumit, Unammilleqatigiinnermut Ataatsimiititaliap aalajangiinerani pineqartoq imaluunniit pineqartut takkutinningitsoorpata, Unammilleqatigiinnermut Ataatsimiititaliaq tunngavissat pigineqartut tunngavigalugit suliami aalajangiisinnaavoq.

Imm. 3. Unammilleqatigiinnermut Ataatsimiititaliap aalajangiinerani pineqartoq imaluunniit pineqartut, taamaallaat oqaasiinnartigut ilanngussaqaarnissamut imaluunniit ilanngussaqaarnissanut, aammalu

tassunga atatillugu apeqqutissaasinnaasunut atatillugu Unammilleqatigiinnermut Ataatsimiititaliami ataatsimiinnerup nalaani najuussinnaatitaapput.

Kapitali 4

Arlaannut attuumassuteqarneq

§ 9. Unammilleqatigiinnermut Ataatsimiititaliamut ilaasortaq suliap sammineqarnerani, pisortat ingerlatsineranni sulianik sammisaqartarneq pillugu inatsisartut inatsisaat malillugu ilaasortaq suliameq arlaannut attuumassuteqaruni aalajangiisinnaatitaangilaq, aalajangiinnermi peqataasinnaangilaq imaluunniit suliap sammiuneqarnerani arlaatigut peqataasinnaanani.

Imm. 2. Ilaasortaq pissutsinik nammineq suliameq arlaatigut attuumassuteqarsinnaanerminut nalornissutaasinnaasoq pillugu ilisimaleruniuk tamanna pillugu piaarnerpaamik Atuisartunut Unammilleqatigiinnermullu Aqutsisoqarfik nalunaarfigissavaa.

Imm. 3. Ilaasortaq pineqartoq peqataatinnagu taanna arlaannut attuumassuteqarnerasoq pillugu Unammilleqatigiinnermut Ataatsimiititaliaq aalajangiissaaq.

Kapitali 5

Nipangiussisimasussaataaneq

§ 10. Unammilleqatigiinnermut Ataatsimiititaliamut ilaasortat, aalajangiisartullu suliaannik suliarinneqataasoq, pisortat ingerlatsineranni sulianik sammisaqartarneq pillugu inatsisartut inatsiaani maleruagassat malillugit nipangiussisimasussaataanerminik malinnittussaapput.

Imm. 2. Nipangiussisimasussaataanerminut ilaapput paasissutissat sulluunniit, pineqartut Unammilleqatigiinnermut Ataatsimiititaliami atuunnerminnut atatillugu ilisimalersimasaat, assersuutigalugu tamakkununnga ilaallutik suliffeqarfiit aningaasarsiornikkut niuernikkullu atugaat pillugit paasissutissat, kiisalu paasissutissat allat suliffeqarfimmut pineqartumut pingaaruteqartut.

Kapitali 6

Atuutsinneqalerfissaa

§ 11. Nalunaarut manna ulloq 4. februar 2025-mi atuutsinneqalissaaq.

Namminersorlutik Oqartussat, ulloq 3. februar 2024

Naaja Nathanielsen (atsior.)

Inuussutissarsiornermut, Niuernermut, Aatsitassanut, Inatsisit Atuutsinneqarnerannut
Naligiissitaanermullu Naalakkersuisoq

/ Jørgen T. Hammeken-Holm (atsior.)

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut